

Na osnovu člana 4. stav 2. Zakona o sjemenu i sadnom materijalu poljoprivrednog bilja ("Službene novine Federacije BiH, broj 55/01), federalni ministar poljoprivrede, vodoprivrede i šumarstva (u daljem tekstu - federalni ministar) donosi

## **PRAVILNIK O SADRŽAJU, NAČINU I UVJETIMA UPISA U REGISTRE POLJOPRIVREDNOG SJEMENA I POLJOPRIVREDNOG SADNOG MATERIJALA**

### **I- OSNOVNE ODREDBE**

#### **Član 1.**

Ovim se pravilnikom propisuju sadržaj, oblik i način vođenja Registra proizvođača poljoprivrednog sjemena, presadnica i micelija jestivih i ljekovitih gljiva, Registra dorađivača poljoprivrednog sjemena, Registra laboratorija za kontrolu kvaliteta poljoprivrednog sjemena, Registra uvoznika poljoprivrednog sjemena, sadnog materijala, presadnica i micelija jestivih i ljekovitih gljiva, Registra proizvođača poljoprivrednog sadnog materijala i uvjeti koje moraju zadovoljiti pravna lica za upis u Registar te sadržaj prijave za upis.

#### **Član 2.**

Registri iz člana 1. ovog pravilnika vode se na propisanim obrascima koji su štampani uz ovaj pravilnik i čine njegov sastavni dio, a mogu se voditi i elektronskim putem.

#### **Član 3.**

Uz Registre osniva se i:  
zbirka dokumenata, odvojeno za svako upisano pravno lice, u koju se u obliku kartoteke unose dokumenti i drugi spisi u vezi sa upisom.

Imenik registrovanih pravnih lica, uz naznaku broja stranice Registra na kojoj je pojedini subjekt upisa, a vodi se elektronskim putem.

#### **Član 4.**

Upis u Registar i imenik kao i unos dokumenata i drugih spisa u zbirku dokumenata vrši lice koje za to ovlasti federalni ministar.

Ovlašteno lice iz stava 1. ovog člana odgovorno je za pravilan upis i uredno vođenje zbirke dokumenata.

#### **Član 5.**

Podaci upisani u Registar koji se vodi na elektronskom računaru upisuju se na odgovarajući medij kao sigurnosna kopija nakon upisa ili nakon upisa svake promjene.

Ovlašteno lice dužno je čuvati Registar, imenik i zbirku dokumenata tako da se zaštiti od zloupotrebe, oštećenja i uništenja.

#### **Član 6.**

Pravna lica upisana u Registar dužna su prijaviti Federalnom ministarstvu poljoprivrede, vodoprivrede i šumarstva (u daljnjem tekstu: Federalno ministarstvo) sve promjene nastale u uvjetima propisanim ovim pravilnikom i priložiti dokaze o tome.

## **II- REGISTAR PROIZVOĐAČA POLJOPRIVREDNOG SJEMENA, PRESADNICA I MICELIJA JESTIVIH I LJEKOVITIH GLJIVA**

#### **Član 7.**

U Registar proizvođača poljoprivrednog sjemena, presadnica i micelija jestivih i ljekovitih gljiva (u daljnjem tekstu: Registar proizvođača sjemena) upisuju se pravna lica koje se bave proizvodnjom poljoprivrednog sjemena, presadnica i micelija jestivih i ljekovitih gljiva.

#### **Član 8.**

U Registar proizvođača sjemena upisuju se sljedeći podaci:

1. naziv, sjedište (mjesto, ulica i broj) pravnog lica, odnosno proizvođača;
2. registarski broj proizvođača i datum upisa;
3. vrsta i kategorija sjemena, vrsta presadnica i soj gljive koje proizvodi;
4. broj i datum saglasnosti za upis u Registar od nadležnog kantonalnog organa uprave za poslove poljoprivrede (u daljem tekstu: saglasnost kantonalnog ministarstva za upis u Registar);
5. broj i datum rješenja o upisu u Registar i rješenja o brisanju iz Registara;
6. datum objave u "Službenim novinama Federacije BiH".

Obrazac Registara proizvođača sjemena (obrazac RPS) štampan je uz ovaj pravilnik i čini njegov sastavni dio.

### **1. UPIS PROIZVOĐAČA SJEMENA**

#### **Član 9.**

Proizvođači poljoprivrednog sjemena upisuju se u Registar proizvođača sjemena kada ispuni uvjete iz člana 10. ovog pravilnika i na osnovu pismenog zahtjeva upućenog Federalnom ministarstvu.

## Član 10.

Federalno ministarstvo će izvršiti upis u Registar proizvođača sjemena ako podnosilac zahtjeva ispunjava sljedeće uvjete:

1. da je vlasnik, korisnik odnosno da raspolaže zemljištem za proizvodnju sjemena;
2. da raspolaže opremom (mehanizacijom) za primjenu savremenih tehnoloških postupaka u proizvodnji i zaštiti pojedinih vrsta sjemena i usjeva;
3. da raspolaže skladišnim prostorom za smještaj nedorađenog sjemena koji udovoljava minimalnim tehničkim uvjetima i uvjetima propisanim Pravilnikom o uvjetima kojima moraju udovoljavati skladišta i druge prostorije za smještaj bilja te preduzeća koja se bave poslovima dezinfekcije i dezinsekcije bilja i deratizacije prostorija ("Službeni list SFRJ" broj 33/91); (u daljem tekstu: Pravilnik).
4. da poslove rukovođenja proizvodnjom obavlja ili organizuje zaposlenik sa stručnom spremom sedmog (VII/I) stepena obrazovanja poljoprivrednog fakulteta općeg, biljnog ili ratarskog smjera i radnog iskustva od najmanje tri godine na takvim poslovima.

## Član 11.

Uz zahtjev za upis u Registar proizvođača poljoprivrednog sjemena prilažu se sljedeći prilozi:

1. rješenje o upisu u sudski registar;
2. dokaz o vlasništvu zemljišta odnosno dokaz da je proizvođač korisnik zemljišta;
3. dokaz da raspolaže potrebnom mehanizacijom (mašinama) za proizvodnju sjemena;
4. dokaz da raspolaže skladišnim prostorom koji je u vlasništvu ili u zakupu ili ugovor s dorađivačem;
5. dokaz o ispunjavanju uvjeta stepena i vrste stručne spreme te radnom iskustvu zaposlenika koja vodi proizvodnju;
6. saglasnost kantonalnog ministarstva za upis u Registar.

Prilozi se podnose u originalu, prepisu ili fotokopija ovjerena od nadležnog organa za ovjeru (u daljem tekstu: ovjerena fotokopija).

## Član 12.

Federalno ministarstvo neće izvršiti upis ako nisu ispunjeni uvjeti iz člana 10. ovog pravilnika.

## 2. UPIS PROIZVOĐAČA PRESADNICA

### **Član 13.**

U Registar proizvođača sjemena upisuju se pravna lica koje se bave proizvodnjom presadnica povrća, cvijeća, ljekovitog i aromatičnog bilja (u daljnjem tekstu: proizvođač presadnica).

### **Član 14.**

Proizvođač presadnica upisuje se u Registar proizvođača sjemena kada ispuni uvjete iz člana 15. ovog pravilnika i na osnovu pismenog zahtjeva upućenog Federalnom ministarstvu.

### **Član 15.**

Federalno ministarstvo će izvršiti upis u Registar proizvođača presadnica ako podnosilac zahtjeva ispunjava sljedeće uvjete:

1. da je vlasnik, korisnik odnosno da raspolaže zemljištem pogodnog za proizvodnju presadnica;
2. da raspolaže odgovarajućim zaštićenim prostorom za proizvodnju određenih vrsta presadnica;
3. da raspolaže opremom potrebnom za primjenu tehnoloških postupaka u proizvodnji određenih vrsta presadnica;
4. da ima najmanje tri godine iskustva u proizvodnji presadnica.

### **Član 16.**

Uz zahtjev za upis u Registar proizvođača sjemena proizvođač presadnica prilaže sljedeće priloge:

1. rješenje o upisu u sudski registar;
2. dokaz o vlasništvu zemljišta odnosno dokaz da je korisnik zemljišta;
3. dokaz da je vlasnik odnosno korisnik zaštićenog prostora;
4. dokaz da posjeduje potrebnu opremu;
5. izjavu poljoprivrednog proizvođača o ispunjavanju uvjeta o iskustvu u proizvodnji presadnica.
6. saglasnost kantonalnog ministarstva za upis u Registar. Prilozi se podnose u originalu, prepisu ili ovjerena fotokopija.

### **Član 17.**

Federalno ministarstvo neće izvršiti upis ako nisu ispunjeni uvjeti iz člana 15. ovog pravilnika.

### **3. UPIS PROIZVOĐAČA MICELIJA JESTIVIH I LJEKOVITIH GLJIVA**

#### **Član 18.**

U Registar proizvođača sjemena upisuju se pravna lica koja se bave proizvodnjom micelija jestivih i ljekovitih gljiva (u daljem tekstu: proizvođač micelija).

#### **Član 19.**

Proizvođač micelija upisuje se u Registar proizvođača sjemena kada ispuni uvjete iz člana 20. ovog pravilnika i na osnovu pismenog zahtjeva upućenog Federalnom ministarstvu.

#### **Član 20.**

Federalno ministarstvo će izvršiti upis u Registar proizvođača sjemena proizvođača micelija koji ispunjava sljedeće uvjete:

1. da je vlasnik, korisnik odnosno da raspolaže potrebnim zatvorenim ili (i) otvorenim (natkrivenim) prostorom za proizvodnju;
2. da raspolaže opremom potrebnom za primjenu tehnoloških postupaka u proizvodnji micelija;
3. da poslove u proizvodnji micelija vodi zaposlenik sa završenim VII/I stepenom obrazovanja poljoprivrednog fakulteta smjer biljne proizvodnje ili prirodno matematičkog fakulteta studija biologije.

#### **Član 21.**

Uz zahtjev za upis u Registar proizvođača sjemena proizvođač micelija prilaže i sljedeće priloge:

1. rješenje o upisu u sudski registar;
2. dokaz o vlasništvu odnosno o korištenju prostora potrebnog za proizvodnju;
3. dokaz o ispunjavanju uvjeta o stručnoj spremi zaposlenika koji obavlja poslove proizvodnje.
4. saglasnost kantonalnog ministarstva za upis u Registar.

#### **Član 22.**

Federalno ministarstvo neće izvršiti upis ako nisu ispunjeni uvjeti iz člana 20. ovog pravilnika.

### **III - REGISTAR DORAĐIVAČA POLJOPRIVREDNOG SJEMENA**

#### **Član 23.**

U Registar dorađivača poljoprivrednog sjemena upisuju se pravna lica koja dorađuju sjeme (u daljem tekstu: dorađivač sjemena).

#### **Član 24.**

U Registar dorađivača sjemena upisuju se sljedeći podaci:

1. naziv, sjedište (mjesto, ulica i broj) pravnog lica odnosno dorađivača;
2. registarski broj dorađivača i datum upisa;
3. vrsta i kategorija sjemena koje dorađuje;
4. broj i datum saglasnosti kantonalnog ministarstava za upis u Registar;
5. broj i datum rješenja o upisu u Registar i rješenja o brisanju iz Registara;
6. datum objave u "Službenim novinama Federacije BiH".

Obrazac Registara dorađivača sjemena (obrazac RDS) štampan je u prilogu ovog pravilnika i čini njegov sastavni dio.

#### **Član 25.**

Dorađivač sjemena upisat će se u Registar dorađivača uz ispunjavanje uvjeta iz člana 26. ovog pravilnika i na osnovu pismenog zahtjeva upućenog Federalnom ministarstvu.

#### **Član 26.**

Federalno ministarstvo će izvršiti upis u Registar dorađivača poljoprivrednog sjemena, ako podnosilac zahtjeva ispunjava sljedeće uvjete:

1. da je vlasnik, korisnik, odnosno da raspolaže prostorom za smještaj naturalnog sjemena kojeg će dorađivati i prostora za smještaj dorađene robe koji zadovoljava minimalnim tehničkim uvjetima i uvjetima propisanim citiranim Pravilnikom o tehničkoj opremljenosti objekta, sanitarno-higijenskim uvjetima, u pogledu kapaciteta i opreme za dezinfekciju, dezinfekciju i deratizaciju objekta i bilja.
2. da posjeduje opremu za čišćenje, sortiranje, tretiranje i pakovanje sjemena, ovisno o vrstama za koje se upisuju;
3. da poslove dorade sjemena vodi zaposlenik sa završenim VII/I stepenom stručne spreme poljoprivredne struke i najmanje tri godine radnog iskustva na poslovima dorade sjemena;

4. da u svom sastavu ima laboratorij za ispitivanje sjemena ili ugovor s laboratorijem za ispitivanje kvaliteta sjemena.

#### **Član 27.**

Uz zahtjev za upis u Registar dorađivača prilažu se sljedeći prilozi:

1. rješenje o upisu u sudski registar;
2. dokaz o vlasništvu odnosno dokaz o korištenju skladišta za smještaj naturalnog sjemena i skladišta za doradu sjemena;
3. dokaz da posjeduje propisanu opremu, ovisno o vrstama za koje se upisuje;
4. dokaz o ispunjavanju uvjeta o stručnoj spremi zaposlenika koje vodi doradu sjemena;
5. dokaz da ima ovlaštenu laboratorij u svom sastavu odnosno ugovor s ovlaštenim laboratorijem za ispitivanje kvaliteta sjemena;
6. saglasnost kantonalnog ministarstva za upis u Registar.

Prilozi se podnose u originalu, prepisu ili ovjerena fotokopija.

#### **Član 28.**

Federalno ministarstvo neće izvršiti upis ako nisu ispunjeni uvjeti iz člana 26. ovog pravilnika.

### **IV- REGISTAR LABORATORIJA ZA KONTROLU KVALITETA POLJOPRIVREDNOG SJEMENA**

#### **Član 29.**

U Registar laboratorija za kontrolu kvaliteta poljoprivrednog sjemena upisuje se pravno lice koje je registrovano za obavljanje takve djelatnosti ili je u sastavu pravnog lica registrovanog za obavljanje takve djelatnosti.

#### **Član 30.**

U Registar laboratorija za kontrolu kvaliteta poljoprivrednog sjemena upisuju se slijedeći podaci:

1. naziv, sjedište (mjesto, ulica i broj) pravnog lica;

2. registarski broj laboratorija i datum upisa;
3. vrsta sjemena koje ispituje;
4. broj i datum saglasnosti kantonalnog ministarstva za upis u Registar;
5. broj i datum rješenja o upisu u Registar i rješenja o brisanju iz Registara;
6. datum objave u "Službenim novinama Federacije BiH".

Obrazac Registara laboratorija za kontrolu kvaliteta poljoprivrednog sjemena (obrazac RL) štampan je uz ovaj pravilnik i čini njegov sastavni dio.

### **Član 31.**

Federalno ministarstvo će izvršiti upis u Registar laboratorija za kontrolu kvaliteta poljoprivrednog sjemena podnosioca zahtjeva ako ispunjava sljedeće uvjete:

1. da ima zaposlenika sa završenim VII/I stepenom obrazovanja poljoprivrednog fakulteta smjera biljne proizvodnje koji rukovodi laboratorijom;
2. da ima odgovarajući potreban prostor za obavljanje laboratorijskih analiza, određivanje vlage, čistoće, klijavosti i zdravstvenog stanja sjemena, vrste za koje se traži upis u Registar, a prema zahtjevima iz "Metoda ispitivanja sjemena i norme kvaliteta sjemena" koje su sastavni dio Pravilniku o kvalitetu, sjemena poljoprivrednog bilja ("Službeni list SFRJ" br. 47/87, 60/87, 55/88, 81/89.)
3. da ima osnovnu opremu koja se sastoji od: vage, laboratorijskog mlina, sušnice, posude za određivanje vlage, klijališta ili klimakomore, lupe, stereo mikroskopa s povećanjem od 100 puta, mikroskopa s povećanjem 10x4, 10, 40, 100 puta, komorom za naklijavanje s NUV svjetlom te zamrzivača do -25 C a koja zadovoljavaju zahtjeve propisane Pravilniku o kvalitetu, sjemena poljoprivrednog bilja ("Službeni list SFRJ" br. 47/87, 60/87, 55/88, 81/89. )

### **Član 32.**

Uz zahtjev za upis u Registar laboratorija za kontrolu kvaliteta poljoprivrednog sjemena podnosilac zahtjeva prilaže slijedeće priloge:

1. rješenje o upisu u sudski registar;
2. dokaz o ispunjavanju uvjeta stručne spreme zaposlenika koji rukovodi laboratorijem;
3. dokaz o raspolaganju potrebnim prostorom;
4. dokaz o posjedovanju propisane opreme;
5. uvjerenje o ispravnosti mjernih instrumenata;



6. saglasnost kantonalnog ministarstva za upis u Registar.

Prilozi se prilažu u originalu, prepisu ili ovjerena fotokopija.

### **Član 33.**

Federalno ministarstvo neće izvršiti upis u Registar laboratorija za kontrolu kvaliteta poljoprivrednog sjemena podnosioca zahtjeva koji ne ispunjava uvjete iz člana 31. ovog pravilnika.

## **V - REGISTAR UVOZNIKA POLJOPRIVREDNOG SJEMENA, SADNOG MATERIJALA, PRESADNICA I MICELIJA JESTIVIH I LJEKOVITIH GLJIVA**

### **Član 34.**

U Registar uvoznika poljoprivrednog sjemena, sadnog materijala, presadnica i micelija jestivih i ljekovitih gljiva (u daljem tekstu: Registar uvoznika) upisuju se pravna lica koja uvoze sjeme, sadni materijal, presadnice i micelij jestivih i ljekovitih gljiva radi stavljanja u promet na području Federacije Bosne i Hercegovine.

### **Član 35.**

U Registar uvoznika upisuju se sljedeći podaci.

1. naziv, sjedište (mjesto, ulica i broj) pravnog lica odnosno uvoznika i matični-carinski broj uvoznika;
2. registarski broj uvoznika i datum upisa;
3. vrsta poljoprivrednog bilja koje uvozi;
4. broj i datum saglasnosti kantonalnog ministarstva za upis u Registar;
5. broj i datum rješenja o upisu u Registar i rješenja o brisanju iz Registara;
6. datum objave u "Službenim novinama Federacije BiH".

Obrazac Registara uvoznika (Obrazac RUS) štampan je uz ovaj pravilnik i čini njegov sastavni dio.

### **Član 36.**

Federalno ministarstvo će izvršiti upis u Registar uvoznika ako podnosilac zahtjeva ispunjava sljedeće uvjete:

1. da je registrovano za obavljanje djelatnosti trgovine na veliko poljoprivrednim sjemenom i sadnim materijalom;

2. da ima najmanje jednog zaposlenika sa završenim VIII/I stepenom obrazovanja poljoprivrednog fakulteta;
3. da raspolaže skladištem koje zadovoljava minimalnim tehničkim uvjetima za smještaj i uskladištenje robe primjereno vrstama koje uvozi.

#### **Član 37.**

Podnosilac zahtjeva za upis u Registar uvoznika dužan je uz zahtjev za upis priložiti i sljedeće priloge:

1. rješenje o upisu u sudski registar;
2. dokaz o ispunjavanju uvjeta o stručnoj spremi zaposlenika iz člana 36. stava 1. tačke 2. ovog pravilnika;
3. dokaz o vlasništvu odnosno o korištenju skladišta za smještaj i uskladištenje robe koje zadovoljava propisanim minimalnim tehničkim uvjetima i uvjetima propisanim citiranim Pravilnikom o minimalnim tehničkim uvjetima i uvjetima propisanim o tehničkoj opremljenosti objekta, sanitarno-higijenskim uvjeti ma, u pogledu kapaciteta i opreme za dezinfekciju, dezinfekciju i deratizaciju objekta i bilja.
4. saglasnost kantonalnog ministarstva za upis u Registar.

Prilozi se prilažu u originalu, prepisu ili ovjerena fotokopija.

#### **Član 38.**

Federalno ministarstvo neće izvršiti upis u Registar uvoznika ako podnosilac zahtjeva ne ispunjava uvjete iz člana 36. ovog pravilnika.

### **VI - REGISTAR PROIZVOĐAČA POLJOPRIVREDNOG SADNOG MATERIJALA**

#### **Član 39.**

U Registar proizvođača poljoprivrednog sadnog materijala (u daljem tekstu: Registar proizvođača sadnog materijala) upisuju se pravna lica koja proizvode sadni materijal.

#### **Član 40.**

U Registar proizvođača sadnog materijala upisuju se sljedeći podaci:

1. naziv, sjedište (mjesto, ulica i broj) pravnog lica odnosno proizvođača;
2. registarski broj proizvođača i datum upisa;
3. naziv rasadnika odnosno objekta i mjesta:

4. vrsta i kategorija sadnog materijala;
5. broj i datum saglasnosti kantonalnog ministarstva za upis u Registar;
7. broj i datum rješenja o upisu u Registar i rješenja o brisanju iz Registara;
8. datum objave u "Službenim novinama Federacije BiH".

Obrazac Registara proizvođača sadnog materijala (obrazac RPSM ) štampan je uz ovaj pravilnik i čini njegov sastavni dio.

#### **Član 41.**

Proizvođač poljoprivrednog sadnog materijala upisuje se u Registar proizvođača sadnog materijala uz ispunjavanje uvjeta iz člana 42. ovog pravilnika i na osnovu pismenog zahtjeva upućenog Federalnom ministarstvu.

#### **Član 42.**

Federalno ministarstvo će izvršiti upis u Registar proizvođača sadnog materijala ako podnosilac zahtjeva ispunjava sljedeće uvjete:

1. da je vlasnik odnosno korisnik zemljišta ili odgovarajućeg proizvodnog prostora za proizvodnju sadnog materijala;
2. da raspolaže radnim prostorom i opremom ovisno o tehnološkom postupku proizvodnje;
3. da poslove proizvodnje vodi zaposlenik sa završenim VII/I stepenom stručne spreme poljoprivrednog fakulteta, voćarsko-vinogradarsko smjera i radnim iskustvom od najmanje tri godine ili smjera biljna proizvodnja sa pet godina radnog iskustva na poslovima u proizvodnji sadnog materijala;
4. da poslove u proizvodnji sadnog materijala u laboratoriju u "in vitro" uvjetima vodi zaposlenik sa završenim VII/I stepenom obrazovanja poljoprivrednog fakulteta, smjer biljna proizvodnja ili sa završenim prirodno-matematičkim fakultetom smjer molekularna biologija, s tri godine radnog iskustva u proizvodnji u "in vitro" uvjetima.

Iznimno od odredbi stava 1. ovog člana, poslove proizvodnje sadnog materijala cvijeća, ruža, ukrasnog grmlja i drveća osim zaposlenika iz stava 1. tačke 3. ovog člana može voditi i diplomirani inženjer šumarstva s tri godine radnog iskustva ili inženjer šumarstva s pet godina radnog iskustva ili lice sa završenom srednjom stručnom spremom šumarskog ili poljoprivrednog smjera i deset godina radnog iskustva u proizvodnji cvijeća, ruža, ukrasnog grmlja i drveća.

#### **Član 43.**

Uz zahtjev za upis u Registar proizvođača sadnog materijala prilažu se sljedeći prilozi:

1. rješenje o upisu u sudski registar;
2. dokaz o vlasništvu zemljišta odnosno dokaz da je proizvođač korisnik zemljišta odnosno odgovarajućeg proizvodnog prostora;
3. dokaz da raspolaže radnim prostorom i opremom za provođenje odgovarajućeg tehnološkog postupka proizvodnje;
4. dokaz o ispunjavanju uvjeta o stepenu i vrsti stručne spreme te radnom iskustvu zaposlenika koji vodi proizvodnju sadnog materijala.

Prilozi se podnose u originalu, prepisu ili ovjerena fotokopija.

#### **Član 44.**

Federalno ministarstvo neće izvršiti upis ako nisu ispunjeni uvjeti iz člana 42. ovog pravilnika.

### **VII - PRELAZNE I ZAVRŠNE ODREDBE**

#### **Član 45.**

Pravne osobe upisane u Registre do dana stupanja na snagu ovog pravilnika dužna su uskladiti svoje poslovanje s odredbama ovog pravilnika u roku od šest mjeseci od dana njegova stupanja na snagu.

#### **Član 46.**

Stupanjem na snagu ovog pravilnika prestaje primjena odredbi provedbenih propisa o obrascu i načinu vođenja registra proizvođača sadnog materijala poljoprivrednog bilja i načinu vođenja registra proizvođača i dorađivača sjemena poljoprivrednog bilja koji su se primjenjivali na teritoriji Federacije Bosne i Hercegovine do stupanja na snagu ovog pravilnika.

#### **Član 47.**

Ovaj pravilnik stupa na snagu osmog dana od dana objavljivanja u "Službenim novinama Federacije BiH".

Broj 01-02-611-1/02  
29. januara 2003. godine  
Sarajevo

Ministar  
Behija Hadžihajdarević, s. r.



**REGISTAR UVOZNIKA POLJOPRIVREDNOG SJEMENA, PRESADNICA I MICELIJA  
JESTIVIH I LJEKOVITIH GLJIVA**

1.	Redni broj upisa	
2.	Datum upisa	
3.	Naziv pravnog lica	
	Matični -carinski broj uvoznika	
	Kanton	
	Mjesto	
	Ulica i broj	
4.	Broj i datum rješenja o upisu	
5.	Broj i datum saglasnosti kantonalnog ministarstva za upis	
6.	Vrste poljoprivrednog bilja koje uvozi	
7.	Datum objave u "Službenim novinama Federacije BiH"	
8.	Potpis ovlašćenog lica za vođenje registra	
9.	Broj i datum rješenja o brisanju iz registra	
10.	Razlozi brisanja proizvođača iz registra	
11.	Potpis ovlašćenog lica za vođenje registra	
12.	Primjedbe	

REGISTAR PROIZVOĐAČA POLJOPRIVREDNOG SJEMENA, PRESADNICA I MICELIJA  
JESTIVIH I LJEKOVITIH GLJIVA

1.	Redni broj upisa	
2.	Datum upisa	
3.	Naziv pravnog lica	
	Kanton	
	Sjedište	
	Ulica i broj	
4.	Broj i datum rješenja o upisu	
5.	Broj i datum saglasnosti kantonalnog ministarstva za upis	
6.	Vrste i kategorija sjemena koje će proizvoditi	
	Vrsta presadnica	
	Soj gljive	
7.	Datum objave u "Službenim novinama Federacije BiH"	
8.	Potpis ovlašćenog lica za vođenje registra	
9.	Broj i datum rješenja o brisanju iz registra	
10.	Razlozi brisanja proizvođača iz registra	
11.	Potpis ovlašćenog lica za vođenje registra	
12.	Primjedbe	

REGISTAR DORAĐIVAČA POLJOPRIVREDNOG SJEMENA

1.	Redni broj upisa	
2.	Datum upisa	
3.	Naziv pravnog lica	
	Kanton	
	Sjedište	
	Ulica i broj	
4.	Broj i datum rješenja o upisu	
5.	Broj i datum saglasnosti kantonalnog ministarstva za upis	
6.	Vrste i kategorija sjemena koje dorađuje	
7.	Datum objave u "Službenim novinama Federacije BiH"	
8.	Potpis ovlašćenog lica za vođenje registra	
9.	Broj i datum rješenja o brisanju iz registra	
10.	Razlozi brisanja dorađivača iz registra	
11.	Potpis ovlašćenog lica za vođenje registra	
12.	Primjedbe	



**REGISTAR LABORATORIJA ZA KONTROLU KVALITETA POLJOPRIVREDNOG  
SJEMENA**

1.	Redni broj upisa	
2.	Datum upisa	
3.	Naziv pravnog lica	
	Kanton	
	Sjedište	
	Ulica i broj	
4.	Broj i datum rješenja o upisu	
5.	Broj i datum saglasnosti kantonalnog ministarstva za upis	
6.	Vrste sjemena koje ispituje	
7.	Datum objave u "Službenim novinama Federacije BiH"	
8.	Potpis ovlaštenog lica za vođenje registra	
9.	Broj i datum rješenja o brisanju iz registra	
10.	Razlozi brisanja proizvođača iz registra	
11.	Potpis ovlaštenog lica za vođenje registra	
12.	Primjedbe	

**REGISTAR PROIZVOĐAČA POLJOPRIVREDNOG SADNOG MATERIJALA**

1.	Redni broj upisa	
2.	Datum upisa	
3.	Naziv pravnog lica	
	Kanton	
	Sjedište	
	Ulica i broj	
4.	Broj i datum rješenja o upisu	
5.	Broj i datum saglasnosti kantonalnog ministarstva za upis	
6.	Vrste i kategorija sadnog materijal i koje će proizvoditi	
7.	Datum objave u "Službenim novinama Federacije BiH"	
8.	Potpis ovlašćenog lica za vođenje registra	
9.	Broj i datum rješenja o brisanju iz registra	
10.	Razlozi brisanja proizvođača iz registra	
11.	Potpis ovlašćenog lica za vođenje registra	
12.	Primjedbe	